

南朝世族寒門政權之轉移

林 瑞 翰

世 族

世族之門第爲兩晉南朝之社會現象，無論社會、經濟、政治方面均深受其影響。在此期中，世族享有崇高之社會地位，擁有雄厚之經濟力量，而政治形態則因時而異。西晉時代，世族之勢力在政權培植下形成，東晉時代，世族轉而成爲政權之支柱。南朝世族之社會地位愈益穩固，不復措意於政權之得失，務以情恬養其聲望，位高任疏，而實際政權乃落於寒門之手。

東漢後期已出現世族之雛型，汝南袁氏、弘農楊氏即爲當時最大之世族。東漢尚氣節，崇儒術，孝廉察舉多以德行、經術入選，蔚爲累世公卿而成爲漢末之世族，故德行、經術、世族三者有密切之關係。魏武輔漢，以德行不足以撥亂，取士先才後德，於是智計之士崛起而世族之勢式微。司馬懿爲河內世族，懿既綰魏政，乃一矯其弊，進用篤行純德之臣，歷司馬師、司馬昭至晉武帝，其風不改，故晉初名臣，多世族之胤。

自東晉以來，世族有僑姓、吳姓之分。新唐書柳沖傳云：

魏氏立九品，置中正，尊世胄，權歸右姓。晉、宋因之，有司選舉，必稽譜籍。過江則爲僑姓，王、謝、袁、蕭爲大，東南則爲吳姓，朱、張、顧、陸爲大。

僑姓與政治勢力有關，乃自中原隨晉室南渡之世族。王指太原王氏及琅邪王氏。太原王氏始達於王昶，昶仕魏爲司空；昶兄子沈，晉車騎將軍；沈子浚，大司馬；昶子渾，司徒，錄尚書事；渾子濟，侍中，尚武帝女常山公主；渾弟湛，湛子承，並有重望於世；承子述，尚書令，贈驃騎將軍，開府；述子坦之，中書令；坦之子愷，侍中；愷，尚書僕射；國寶，尚書左僕射；忱，右將軍，荊州刺史。琅邪王氏有二支：王戎仕晉爲司徒；徒弟衍，太尉；衍弟澄，荊州刺史；戎祖雄，仕魏爲幽州刺史，戎父津，涼州刺史。王祥，雄之宗也。祥祖仁，魏青州刺史。祥仕晉爲

太保；弟覽，光祿大夫；覽子裁、基，裁子導，位至太傅，又拜丞相；基子敦，尚武帝女襄城公主。導、敦翼戴元帝，中興晉室，功業之盛，一時無二，自是累世貴顯。入宋以後，戎族無聞，導族獨盛，故稱門閥者，以導族為首焉。

謝指陳郡謝氏，始顯於東晉成、康之世。謝鯤，豫章太守；鯤弟裒，吏部尚書，與鯤並有重名於江左。鯤子尚，衛將軍，開府儀同三司；裒子奕、安、萬、據、石、鐵；奕，豫州刺史；安，太保，贈太傅；萬，豫州刺史；據，早卒；石，衛將軍，贈司空；鐵，永嘉太守；奕子玄，左將軍，會稽內史，贈車騎將軍，開府儀同三司。孝武帝太元中，安當國，遣弟石及從子玄擊破前秦苻堅之軍於淝水，由是門第始著，直逼王氏。

袁指陳郡袁氏。袁氏雖亦世族，至宋袁淑而門第始大。淑父豹，丹陽尹；豹兄湛，尚書右僕射；湛父質，晉琅邪內史；質父耽，歷陽內史。淑仕宋文帝為太子左衛率，死太子劭之難，贈太尉。淑兄洵、濯；洵，吳郡太守。洵子顗、鯤；顗，雍州刺史；鯤，武陵內史。濯子粲，司徒，死東昏之難。自是奕世貴顯，為南朝望族。顗子君正、昂；君正，吳郡太守；昂，梁司空，尚書令。鯤子彖，齊侍中。君正子樞、憲；樞，陳尚書左僕射；憲，尚書右僕射。昂子敬、泌；敬，陳特進；泌，金紫光祿大夫。

蕭指蘭陵蕭氏，亦中原世族，然門第本不甚高。南齊書高帝紀建元四年三月詔司徒褚淵、左僕射王儉云：「吾本布衣素族，念不到此，因藉時來，遂隆大業。」自齊高、梁武為帝而門第始大。

吳姓為吳立國江左時之舊姓。朱謂丹陽朱氏，張謂彭城及廣陵張氏，顧謂吳郡顧氏，陸謂吳郡陸氏。朱氏門第興自朱治，治始事孫堅，輔翼孫策，奉立孫權。張氏門第興自張昭、張紘，見知於孫策。顧氏門第興自顧雍，陸氏門第興自陸遜，並為孫權所委任。自是累世貴顯，宗族繁盛，為江東著姓。

吳為晉滅，故吳姓地位不若僑姓。晉書陸玩傳：

玩為元帝丞相參軍元帝為丞相時，玩為參軍，時王導初至江左，思結人情，請婚於玩。玩曰：「培塿無松柏，薰蕕不同器。玩雖不才，義不能為亂倫之始。」培塿，玩自喻南土門第卑微也。故吳士素望雖隆，罕有居僕射者。南齊書張緒傳：緒善言善清言也，素望甚重，太祖高帝深加敬異。僕射王儉謂人曰：「北土中覓張緒，過江未有人。」云北土才若張緒者，自過江以來未有也。上欲用緒為右僕射，以問王儉，儉曰：「南土由來少居此職。」褚淵在坐，啓上曰：「儉年少，或不盡憶。江左凡言江左，皆謂東晉用陸玩、顧和，皆南人也。」儉曰：「晉氏政衰，不可以為準則。」上乃止。

南齊書沈文季傳，齊武帝亦謂文季曰：「南士無僕射，多歷年所。」而僞姓膏腴之族，惟作吏部，不爲餘曹郎。晉書王國寶傳：

中興膏腴之族，惟作吏部，不爲餘曹。

梁書王筠傳：

除尚書殿中郎。王氏過江以來，未有居郎署者。或勸逡巡不就，筠曰：「陸平原陸機爲平原內史東南之秀，王文度王坦之字文度獨步江東，吾得比蹤昔人，何所多恨。」乃欣然就職。

然自世族門第之發展而言，吳姓爲土著，歷史悠久，基礎深厚，故東晉及南朝，實賴其力以立國。

世族之清恬

梁書何敬容傳：

自晉宋以來，宰相皆文義自逸，敬容獨勤庶務，爲世所嗤鄙。

姚察何敬容傳論：

魏正始及晉之中朝，時俗尚於玄虛，貴爲放誕，尚書丞郎以上，簿領文案，不復經懷，皆成於令史。逮乎江左，此道彌扇，惟卞壺以臺閣之務，頗欲綜理，阮孚謂之曰：「卿常無閑暇，不乃勞乎。」宋世王敬弘身居端右，未嘗省牒，風流相尚，其流遂遠。望白署空，是爲清貴，恪勤匪懈，終滯鄙俗。

梁書王泰傳：

自過江，吏部郎不復典大選。令史以下，小人求競者輻湊。令史以下吏典選，求競者輻湊也

蓋自西晉以來，世族率以清恬不治事爲貴，東晉因之未革，至南朝而其風彌盛，舉例如下。宋書王敬弘傳：

王敬弘，琅邪臨沂人也。少有清尚，性恬靜，樂山水。爲天門太守，山郡無事，恣其遊適，累日不廻。宋國建，爲度支尚書，遷太常。高祖受命，補宣訓衛尉宣訓，太后宮。宮卿位在正卿上，加散騎常侍。永初三年，轉吏部尚書，常侍如故。敬弘每被除召，即便祇奉，既到宜退，旋復解官，高祖嘉其志，不苟違也。元嘉三年，爲尚書僕射，關署文案，初不省讀。嘗豫聽訟，上問疑獄，敬弘不對。上變色，問左右何故不以訊牒副僕射。敬弘曰：「臣乃得訊牒，讀之政自不解。」上甚不說。六年，遷尚書令，敬弘固讓，表求還東。上不能奪，改授侍中、特進、光祿大夫。

宋書王弘傳：

王弘，琅邪臨沂人也。曾祖導，晉丞相；祖洽，中領軍；父珣，司徒。弘少好學，以清恬知名。博練治體，留心庶事，斟酌時宜，每存優允。弘仕至侍中、中書監、太保、錄尚書事

宋書謝方明傳：

謝方明，陳郡陽夏人，尚書僕射景仁從祖弟也。方明自然有雅韻，從兄混有重名，唯歲節朝宗而已。高祖受命，遷侍中，永初三年，出爲丹陽尹，轉會稽太守。江東民戶殷盛，風俗峻刻。方明深達治體，不拘文法，潤略苛細，務存綱領，簡汰精當，各愼其宜。

宋書蔡廓傳：

蔡廓，濟陽考城人也，曾祖謨，晉司徒。廓博涉羣書，以方鯁閑素爲高祖所知。

宋書羊欣傳：

羊欣，泰山南城人。曾祖忱，晉徐州刺史；祖權，黃門郎；父不疑，桂陽太守。欣少靖默，無競於人。太祖文帝以爲新安太守，前後凡十三年，遊玩山水，甚得適性。自非尋省近親，不妄行詣。

宋書何尚之傳：

何尚之，廬江灊人也。雅好文義，從容賞會，甚爲太祖所知。遷侍中、丹陽尹，徙中書令、中護軍、尚書右僕射，遷左僕射。元嘉二十八年，轉尚書令。元凶太子劭弑立，進位司空，領尚書令。世祖孝武帝即位，復爲尚書令，領吏部。尚之愛尚文義，立身簡約，秉衡當朝，畏遠權柄，親戚故舊，一無薦舉。

宋書徐湛之傳：

元嘉二十八年，轉尚書僕射，領護軍將軍。時尚書令何尚之以湛之國戚湛之母爲武帝長女會稽公主，任遇隆重，欲以朝政推之，凡諸詞訴，一不料省。

宋書王惠傳：

王惠，琅邪臨沂人，太保弘從祖也。祖劭，車騎將軍；父默，左光祿大夫。惠幼而夷簡，爲叔父司徒謐所知。恬靜不交遊，未嘗有雜事。

宋書謝弘微傳：

謝弘微，陳郡陽夏人也。從叔峻，司空琰第二子，無後，以弘微爲嗣。太祖卽位，爲黃門侍郎，遷尚書吏部郎，參預機密，尋轉右衛將軍。弘微居身清約，器服不華，而飲食滋味，盡其豐美。口不言人短長，志在素官，畏忌權寵。

宋書謝莊傳：

謝莊，陳郡陽夏人，太常弘微子也，韶令美容儀。太祖見而異之，謂尚書僕射殷景仁、領軍將軍劉湛曰：「藍田出玉，豈虛也哉。」世祖踐阼，遷左衛將軍，拜吏部尚書。莊素多疾，不願居選部，坐辭疾多免官。

宋書王球傳：

王球，琅邪臨沂人，太常惠從父弟也。父謚，司徒。元嘉四年，爲義興太守，在郡有寬惠之美。入爲侍中，徙中書令，遷吏部尚書。球公子簡貴，素不交遊，筵席虛靜，門無異客。

南齊書王秀之傳：

王秀之，琅邪臨沂人也。祖裕，宋左光祿大夫、儀同三司；父瓚之，金紫光祿大夫。秀之起家著作佐郎，世祖卽位，累官都官尚書。初，秀之祖裕性貞正，徐羨之、傅亮當朝，裕不與來往，及致仕，隱吳興，與子瓚之書曰：「吾欲使汝處不競之地。」瓚之歷官至五兵尚書，未嘗詣一朝貴。江湛謂何偃曰：「王瓚之便是今之朝隱。」及柳元景、顏師伯令僕貴要，瓚之竟不候之。至秀之爲尚書，又不與令王儉接款。三世不事權貴，時人稱之。

宋書袁粲傳：

廢帝元徽二年，授中書監，卽本號開府儀同三司，領司徒。三年，徙尚書令，加侍中。時粲與齊王齊高帝、褚淵、劉秉入直，平決萬機，時謂之四貴。粲閑默寡言，不肯當事，主事每往諮決，或高詠對之。宅宇平素，器物取給。好飲酒，善吟諷，獨酌園庭，以此自適。居負南廓，時策杖獨遊，素寡往來，門無雜客。及受遺當權，四方輻輳，閑居高臥，一無所接，談客文士，所見不過一二人。

宋書蕭惠開傳：

蕭惠開，南蘭陵人，征西將軍思話子也。少有風氣，涉獵文史，家雖貴戚而居服簡素。

宋書顧覲之傳：

顧覲之，吳郡吳人也，爲山陰令。山陰海內劇邑，覲之理繁以約，縣用無事。盡日垂簾，門階閑寂，自宋世爲山陰，務簡而績修，莫能尚也。

又曰：

覲之常謂秉命有定分，非智力所移，唯應恭己守道，信天任運，而闇者不達不達此理，妄求僥倖，徒虧雅道，無關得喪。乃以其意命弟子愿著定命論。

南齊書蔡約傳：

蔡約，濟陽考城人也。祖廓，宋祠部尚書；父興宗，征西儀同。約少尚宋孝武女安吉公主，拜駙馬都尉。建武元年，遷侍中。好飲酒，夷淡不與世雜。

南齊書王延之傳：

王延之，琅邪臨沂人也。祖裕，宋左光祿、儀同三司；父昇之，都官尚書。延之少而靜默，不交人事。舉秀才，累遷左僕射。宋德既衰，太祖高帝輔政，朝野之情，人懷彼此，延之與尚書令王僧虔中立，無所去就，時人爲之語曰：「二王持平，不送不迎。」太祖以此善之。昇明三年，出爲使持節，都督江州、豫州之新蔡、晉熙二郡諸軍事，安南將軍，江州刺史。建元二年，進號鎮南將軍。在州俸祿以外，一無所納，獨處齋內，吏民罕得見者。

南齊書王僧虔傳：

王僧虔，琅邪臨沂人也。祖珣，晉司徒；伯父太保弘，宋元嘉世爲宰輔；父曇首，右光祿大夫。僧虔弱冠，弘厚善隸書，退默少交接。昇明二年，爲尚書令。建元元年，轉侍中、撫軍將軍、丹陽尹。二年，遷持節、都督湘州諸軍事、征南將軍、湘州刺史，侍中如故。世祖武帝卽位，遷侍中、左光祿大夫、開府儀同三司左光祿大夫開府位從公。僧虔謂兄子儉曰：「汝任重於朝，行當有八命之禮公八命，我若復此授，則一門有二台司，實可畏懼。」乃固辭不拜，上優而許之，改授侍中、特進、左光祿大夫。客問僧虔固讓之意，僧虔曰：「君子所憂無德，不憂無寵。吾衣食周身，榮位已過，所慙庸薄無以報國，豈容更受高爵，方貽官謗邪！」

南齊書徐孝嗣傳：

徐孝嗣，東海郯人也。祖湛之，宋司空。孝嗣幼而挺立，風儀端整。明帝卽位，累遷侍中、中軍大將軍，轉尚書令。孝嗣愛好文學，賞託清勝，器宇弘雅，不以權勢自居，恭己自保，朝野以此稱之。帝疾甚，孝嗣入居禁中，臨崩受遺託，加中書監，永元初輔政。帝失德稍彰，孝嗣不敢諫諍，羣小用事，亦不能制也。

南齊書謝朓傳：

謝朓，陳郡陽夏人也。祖弘微，宋太常；父莊，金紫光祿大夫。世祖卽位，累遷吏部尚書。高宗明帝廢鬱林，領兵入殿，左右驚走報朓，朓與客圍碁，竟局乃還齋臥，竟不問外事也。

梁書謝朓傳：

謝朓，陳郡陽夏人也。祖弘微，宋太常卿；父莊，右光祿大夫。齊永明元年，起家通直散騎常侍，累遷侍中，出爲冠軍將軍、義興太守。在郡不省雜事

，悉付綱紀長史、主簿並郡綱紀，曰：「吾不能作主者吏，但能作太守耳。」肱內圖止足，且實避事。弟滿時爲吏部尚書，肱至郡，致滿數斛酒，遺書曰：「可力飲此，勿豫人事。」

梁書王亮傳：

王亮，琅邪臨沂人，晉丞相導之六世孫也。亮以名家子，宋末選尚公主，拜駙馬都尉。建武末，爲吏部尚書。是時尚書右僕射江祐管綜朝政，多所進拔。及祐遇誅，羣小放命，凡所除拜，悉由內寵，亮更弗能止。外若詳審，內無明鑒，其所選用，拘資次而已。

南齊書高帝紀：

宋明帝崩，遺詔以太祖爲右衛將軍，與尚書令袁粲、護軍褚淵、領軍劉劭共掌機事。劭高尚其志，託造園宅，名爲東山，頗忽世務。粲位任雖重，無經世之略，疏放好酒，步屨白楊郊野閒道，遇一士大夫，便呼與飲。明日，此人謂被知顧，到門求通，粲曰：「昨日飲酒無偶，聊相邀耳。」竟不與相見。嘗作五言詩云：「訪迹雖中字，循寄乃滄州。」此語云視仕猶隱也蓋其志也。

南齊書張緒傳：

張緒，吳郡吳人也。少知名，清簡寡欲，忘情榮祿。世祖卽位，爲吏部尚書、太子詹事。緒每朝見，世祖目送之，謂王儉曰：「緒以位尊我，我以德貴緒也。」緒口不言利，有財輒散之，清言端坐，或竟日無食。門生見緒饑，爲之辦食，然未嘗求也。

南齊書柳世隆傳：

世祖卽位，爲鎮南將軍、湘州刺史，入爲尚書左僕射，轉尚書令。在朝不干世務，垂簾鼓琴，風韻清遠，甚獲世譽。

梁書張稷傳：

張稷，吳郡人也。父永，宋右光祿大夫。高祖梁武帝受禪，累遷領軍將軍，出爲吳興太守，政稱寬恕。

梁書王志傳：

王志，琅邪臨沂人。祖曇首，宋左光祿大夫；父僧虔，齊司空。齊永明二年，累遷吏部尚書，改領右衛將軍。梁臺建，遷散騎常侍，中書令。天監元年，遷冠軍將軍、丹陽尹。志爲政清靜，及居京尹，便懷止足，因謝多病，簡通賓客。

梁書殷鈞傳：

殷鈞，陳郡長平人也，恬靜簡交遊，好學有思理。高祖與鈞父勸少故舊，故以女妻鈞，即興平公主也。天監初，拜駙馬都尉，起家秘書郎，出爲明威將軍、臨川內史。鈞體羸多疾，閉閣臥治，而百姓化其德，刦盜皆奔出境。

梁書王瑩傳：

王瑩，琅邪臨沂人也。高祖踐祚，累遷侍中、尚書令。瑩性清慎，居官恭恪。

梁書王峻傳：

王峻，琅邪臨沂人。曾祖敬弘，宋左光祿大夫、開府儀同三司；祖瓚之，金紫光祿大夫；父秀之，吳興太守。峻性詳雅，無趨競心。天監三年，拜侍中，淡然自守，無所營務。

梁書張率傳：

張率，吳郡吳人。祖永，宋右光祿大夫；父瓌，天監初，授右光祿，加給事中。率起家著作佐郎，累遷昭遠將軍、司徒右長史、揚州別駕。率雖歷居職務，未嘗留心簿領。及爲別駕奏事，高祖覽牒問之，並無對，但奉答云：「事在牒中。」

梁書謝舉傳：

謝舉，陳郡陽夏人，中書令覽之弟也，起家秘書郎。大同九年，累遷侍中、尚書僕射。舉雖居端揆，未嘗肯預時務。

梁書虞荔傳：

虞荔，會稽餘姚人也。祖權，梁廷尉卿、永嘉太守；父檢，平北始興王諮議參軍。荔有志操，博覽羣籍。梁武帝於城西置士林館，荔爲士林學士，尋爲司文郎，遷通直散騎郎，兼中書舍人。時左右之任，多參權軸，內外機務，互有帶掌，荔淡然靖退，但以文史見知。

又荔弟寄傳：

寄好學善屬文，性沖靜，有棲遁之志。

梁書張種傳：

張種，吳郡人也。祖辯，宋司空右長史、廣州刺史；父略，梁太子中庶子、臨海太守。種少恬靜，居處雅正，不妄交遊，傍無造請。

梁書陸瓊傳：

陸瓊，吳郡吳人也，博學善屬文。永定中，州舉秀才。至德元年，除度支尚書，兼掌詔誥，後主甚委任焉。瓊性謙儉，雖位望日隆而執志愈下，暮年深懷止足，思避權要，恆謝病不視事。

陳書蔡凝傳：

蔡凝，濟陽考城人也。祖搏，梁吏部尚書、金紫光祿大夫；父彥高，梁給事黃門侍郎。凝博涉經傳，天嘉四年，釋褐授秘書郎，太建元年，遷太子中舍人，以名公子選尚信義公主，拜駙馬都尉，授寧遠將軍，尚書吏部侍郎。凝年位未高，而才地爲時所重，常端坐西齋，自非素貴名流，罕所交接。

陳書蕭允傳：

蕭允，蘭陵人也。曾祖思話，宋征西將軍、開府儀同三司、尚書右僕射；祖惠蒨，散騎常侍、太府卿、左民尚書；父介，梁侍中、都官尚書。允少知名，起家邵陵王法曹參軍，高宗陳宣帝即位，累遷光祿卿。允性敦重，未嘗以榮利干懷。

陳書袁樞傳：

袁樞，陳郡陽夏人，梁吳郡太守君正之子也。性沉靜，好讀書。家世顯貴，貲產充積，而樞獨居處率素，傍無交往，端坐一室，非公事未嘗出遊，榮利之懷淡如也。

餘如世族清談之士，亦多沉深虛靜，希心玄遠，不以世務嬰懷。

世族以清流自許，故重風儀。南朝世族，亦多儀表超邁，容止出衆。如宋書王景文傳：

景文美風姿。

宋書王球傳：

球美容止。

宋書謝晦傳：

晦美風姿，善言笑，眉目分明，鬢髮如點漆。

宋書謝莊傳：

莊美容儀。

宋書謝述傳：

述美風姿，善舉止。

宋書羊欣傳：

欣美言笑，善容止。

宋書江夷傳：

夷美風儀，善舉止。

宋書張敷傳：

敷性整貴，風韻端雅。

南齊書王儉傳：

儉作解散髻，斜插幘管，朝野慕之，相與放效。儉常謂人曰：「江左風流宰相，唯有謝安。」蓋以自比也。

南齊書褚淵傳：

淵美儀貌，善容止，俯仰進退，咸有風則。每朝會，百僚、遠國使莫不目送之。宋明帝嘗歎曰：「褚淵能遲行緩步，便持此得宰相矣。」

南齊書徐孝嗣傳：

孝嗣善趨步，閑容止，與太宰褚淵相埒。

梁書王峻傳：

峻少美風儀，善舉止。

梁書王暕傳：

暕風神警拔。

陳書謝哲傳：

哲美風儀，舉止醞藉。

陳書謝峻傳：

峻風神清雅。

陳書袁樞傳：

樞美容儀。

陳書蕭允傳：

允風神凝遠，容止醞藉。

陳書蕭乾傳：

乾容止雅正。

陳書陸瓊傳：

瓊風神警亮，進退詳審。

陳書陸縉傳：

縉儀表端麗，進退閑雅。

陳書虞荔傳：

荔美風儀。

陳書蔡凝傳：

凝美容止。

皆其例也。

世族之能以清恬自處，原因之一為仕途之清濁，恆取決於門第之高低。高門子

弟，不憂不達。南齊書王僧虔傳：

僧虔第九子寂，性迅勤，好文章。王融敗後，融謀立竟陵王子良未果，為廢帝昭業所誅，賓客多歸之。建武初，欲獻中興頌，兄志謂之曰：「汝膏粱年少，何患不達，不鎖之以靜，將恐貽譏。」

原因之二為世族子弟多富於財。世族之社會地位既高，費用復無虞匱乏，乃養成其鄙薄俗務，清虛恬靜之性格。

南朝世族憑藉其政治勢力，封山占澤，據有廣漠之莊園，蓄養衆多莊客為其經營各種產業。南朝世族莊園之景況，可從宋書謝靈運傳山居賦見之：

其居也，左湖右江，往渚還汀，面山背阜，東阻西傾，抱含吸吐，款跨紆榮，繇聯邪互，側直齊平。近東則上田下湖，西谿南谷，石塢石澗，閔劓黃竹。決飛泉於百仞，森高薄於千麓，寫長源於遠江，派深埒於近瀆。近南則會以雙流，榮以三洲，表裏回游，離合山川。崕崩飛於東峭，榮傍薄於西阡，拂青林而激波，揮白沙而生漣。近西則楊賓接峯，唐皇連縱，室壁帶谿，曾孤臨江。竹緣浦以被綠，石照澗而映紅，月隱山而成陰，木鳴柯以起風。近北則二巫結湖，兩智通沼，橫石判盡，休周分表。引修隄之逶迤，吐泉流之浩蕩，山巖下而回澤，瀨石上而開道。曲術周乎前後，直陌蠶其東西。豈伊臨谿而傍沼，乃抱阜而帶山。考封域之靈異，實茲境之最然，葺駢梁於巖麓，棲孤棟於江源。敞南戶以對遠嶺，闢東窗以矚近田，田連岡而盈疇，嶺枕水而通阡。阡陌縱橫，塍埒交經，導渠引流，脈散溝并。蔚蔚豐秋，苾苾香稭，送夏早秀，迎秋晚成。兼有陵陸，麻麥粟菽，候時規節，遞藝遞孰。供粒食與漿飲，謝工商與衡牧，生何待於多資，理取是於滿腹。自園之田，自田之湖，泛濫川上，緬邈水區。濬潭澗而窈窕，除孤洲之紆餘，苾溫泉於春流，馳寒波而秋徂。風生浪於蘭渚，日倒影於椒塗，飛漸樹於中沚，取水月之歡娛。旦延陰而物清，夕棲芬而氣敷，顧情交之永絕，覩雲客之暫如。若迺南北兩居，水通陸阻，觀風瞻雲，方知厥所。南山則夾渠二田，周嶺三苑，九泉別澗，五谷異穡。羣峯參差出其間，連岫複陸成其坂，衆流灌溉以環近，諸隄擁抑以接遠。遠隄兼陌，近流開湍，淩阜泛波，水往步還。求歸其路，迺界北山，棧道傾虧，蹬閣連卷。復有水逕，繚繞回圓，瀾瀾平湖，泓泓澄淵。孤岸竦秀，長洲芊綿，既瞻既眺，曠矣悠然。及其二川合流，異源同口，赴隘入險，俱會山首。瀨排沙以積丘，峯倚渚以起阜，石傾瀾而稍巖，木映波而結蔕。北山二園，南山三苑，百果備列，乍近乍遠。羅行布株，迎早候晚，猗蔚溪澗，森疏崖巖。杏壇榛園，橘林栗圃，桃李多品，梨棗殊

所。枇杷林檎，帶谷映渚，樾梅流芳於回轡，棹柿被實於長浦。

謝靈運莊園爲現存史料中南朝莊園之最大者。靈運爲謝玄之孫，南朝巨族。然謝氏子孫不止靈運一人，而琅邪王氏之門第亦在謝氏之上，故靈運之莊園未必爲南朝之最大者，第以山居賦之流傳而令後人得窺南朝世族莊園之大概。又宋書孔靈符傳：

靈符家本豐，產業甚廣，又於永興立墅，靈符家在會稽，周回三十三里，水陸地二百六十五頃，含帶二山，又有果園九處。

宋書謝弘微傳：

叔父混，仍世宰輔，混仕至尚書左僕射；混父琰，司空；琰父安，太傅，一門兩封，安封廬陵公，琰封望蔡公，田業十餘處，僮僕千人。

南朝莊園多在會稽，因南朝名族巨室多居於此。南朝世族以其政治力量配合雄厚之財力，環繞若干無主山澤，廣置莊園，使其中山澤成爲私產，此即所謂封山占澤，其範圍之廣，遠非北朝世族之農莊所可比擬。宋書羊玄保傳，大明初，揚州刺史西陽王子尚上言：

嵐山封水，保爲家利。富強者兼嶺而占，貧弱者薪蘇無託。

梁書顧憲成傳：

司徒竟陵王子良於宣城、臨成、定陵三縣界立屯，封山澤數百里，禁民樵採。

皆爲封山占澤之例。又如南齊書何戢傳：

戢家業富盛，性又華侈，衣被服飾，極爲奢麗。

南齊書到撝傳：

撝資籍豪富，厚自奉養。宅宇山池，京師第一，妓妾姿藝，皆窮上品。才調流瞻，善納交流。庖廚豐腆，多致賓客。

南齊書虞棕傳：

棕治家富殖，奴婢無遊手，雖在南土，而會稽海味，無不畢致焉。

陳書袁樞傳：

樞家世顯貴，貲產充積。

皆世族財力富盛之例。

寒門之得政

世族既清恬不治事，政權乃落於寒門之手。南朝三姓，劉、陳二姓皆出身寒門

宋書后妃傳：「高祖微時，貧約過甚，孝皇（武帝父諡孝皇帝）之姐，葬禮多闕。」陳書後主紀論：「高祖拔

起繼嗣。」，而蕭姓門第本不甚高南齊書高帝紀建元四年三月詔：「吾本布衣素族。」，故寒士之有才幹者多見重用，布衣素族由是起而秉權。南朝寒門秉權之途有三，一為佐命勳臣，二由軍功而起，三以才幹恩倖為君主所任。

寒門由佐命勳臣起而秉權者，宋有劉穆之、徐羨之、劉敬宣；齊有荀伯玉、江謐、王敬則、陳顯達；梁有呂僧珍、徐勉。

劉穆之

穆之字道和，小字道民，東莞莒人，世居京口，少好讀書，博覽多通。武帝舉義師，以穆之為主簿，從平京邑，委以腹心之任，動止咨焉。穆之竭節盡誠，無所隱遺。累官尚書左僕射，領丹陽尹。穆之起自寒微，既貴，性奢豪，食必方丈，未嘗獨餐。每至食時，客止十人，以此為常。嘗白武帝曰：「穆之家本貧賤，贍生多闕，自叨忝以來，雖每存約損，而朝夕所須，微為過豐，自此以外，一毫不以負公。」

穆之之功業，歸納之可得五端。

一、整頓政風。宋書劉穆之傳：

時晉安帝時晉綱寬弛，威禁不行，盛族豪右，負勢陵縱，小民窮蹙，自立無所，重以司馬元顯政令違舛，桓玄科條繁密，穆之斟酌時宜，隨方矯正，不盈旬日，風俗頓改。

二、佐武帝定霸業。宋書劉穆之傳：

義熙三年，揚州刺史王謐薨，高祖武帝廟號高祖次應入輔，劉毅等不欲高祖入，議以中領軍謝混為揚州，或欲令高祖於丹徒領州，以內事付尚書僕射孟昶，遣尚書右丞皮沈以二議咨高祖。沈先見穆之，具說朝議。穆之偽起如廁，即密疏白高祖曰：「皮沈始至，其言不可從。」高祖既見沈，且令出外，呼穆之問曰：「卿言沈言不可從，其意何也？」穆之曰：「昔晉朝失政，非復一日，加以桓玄篡奪，天命已移。公興復皇祚，勳高萬古，既有大功，便有大位，位大勳高，非可持久。公今日形勢，豈得居謙自弱，遂為守蕃之將邪！劉孟諸公劉毅、孟昶，與公俱起布衣，一時推功，非為委體心服，宿定臣主之分也。力敵勢均，終相吞咀。揚州根本所係，不可假人。前者以授王謐，事出權道，今若復以他授，便應受制於人，可不熟念。今朝議如此，宜相酬答，云神州治本，宰輔崇要，興喪所階，宜加詳擇，此事既大，非可懸論，便暫入朝，共盡同異。公至京，彼必不敢越公更授餘人明矣。」高祖從其言，由是入輔。

武帝霸業，實奠於此。

三、爲武帝耳目。宋書劉穆之傳：

從征廣固南燕都廣固，還拒盧循，常居幙中畫策，決斷衆事。劉毅等疾穆之見親，每從容言其權重，高祖愈信仗之。穆之外所聞見，莫不大小必白，雖復閭里言謔，塗陌細事，皆一一以聞，高祖每得民間委密消息以示聰明聰明謂無蔽也，皆由穆之也。人或譏之，穆之曰：「以公之明，將來會自聞達，我蒙公恩，義無隱諱，此張遼所以告關羽欲叛也。謂遼告羽欲叛之情於操，亦基此義」

四、撫安諸葛長民。宋書劉穆之傳：

高祖西討劉毅，以諸葛長民監留府，總攝後事。高祖疑長民難獨任懼其叛已，留穆之以輔之。加建威將軍，置佐吏，配給實力實力謂兵力。長民果有異謀，而猶豫不能發，乃屏人謂穆之曰：「悠悠之言，皆云太尉武帝時爲太尉與我不平，何以至此！」穆之曰：「公泝流遠伐，而以老母稚子委節下，若一毫不盡謂若有纖芥之際，豈容如此邪！」意乃小安。高祖還，長民伏誅。

五、總留府事。宋書劉穆之傳：

義熙十一年，高祖西伐司馬休之，中軍將軍道憐知留任，而事無大小，一決穆之。十二年，高祖北伐，留世子爲中軍將軍，監太尉留府，轉穆之左僕射，領監軍、中軍二府軍司，入居東城東城即東府，本會稽王道子故宅，在故揚州州廡之東，故稱東府，亦曰東城。穆之內總朝政，外供軍旅，事無壅滯。賓客輻輳，求訴百端，內外諮稟，盈階滿室，目覽辭訟，手答牋書，耳行聽受，口並酬應，不相參涉，悉皆瞻舉。十三年十一月卒，時年五十八。高祖在長安，聞問，驚慟哀惋者數日。本欲頓駕關中，經略趙魏，穆之既卒，京邑任虛，乃馳還彭城，以司馬徐羨之代管留任，而朝廷大事當決穆之者並悉北諮。

穆之既卒，武帝表晉安帝曰：「穆之爰在布衣，協佐義始義始謂始興義師，內端謀猷，外勤庶政，密勿黽勉從事也軍國，心力俱盡。臣伏思尋自義熙草創，桓玄篡晉，晉祚已移，宋武復之，改元義熙，故曰草創艱患未弭，外虞既殷外虞謂用兵譙蜀、南燕及後秦，內難弭結內難謂盧循、劉毅、司馬休之之難，時屯世故遭時屯遭而世多故也，靡歲暫寧。豈臣之寡乏，負荷國重，實賴穆之匡翼之益。豈唯嘉謨讜言，溢於民聽，若乃忠規遠畫，潛慮密謀，造膝詭辭，莫見其際。功隱於視聽隱於視聽謂非民視聽之所及，事隔於皇朝皇朝謂晉朝，言其事功之未爲朝廷所悉者，不可稱記。所以陳力一紀十二年爲一紀，克遂有成，出征入輔，幸不辱命，微夫人之左右夫人猶曰斯人，左右，佐佑也，未有寧濟其事者矣。」宋書劉穆之傳

徐羨之

羨之字宗文，東海郟人也，少爲王雅太子少傅主簿，劉牢之鎮北功曹。桓玄篡

立，以從兄修爲撫軍將軍、徐兗二州刺史，都督六州，鎮京口，以羨之爲中兵參軍，與宋武帝同府，深相親結。武帝爲太尉，羨之累轉太尉左司馬，副劉穆之掌留任。穆之卒，遷吏部尚書，領丹陽尹，繼穆之總知留府事。武帝踐阼，遷尚書令、揚州刺史，加散騎常侍，進位司空，錄尚書事，常侍、刺史如故。羨之以志力局度爲武帝所知。宋書徐羨之傳：

高祖踐阼，羨之遷尚書令、揚州刺史，加散騎常侍，進位司空，錄尚書事，常侍、刺史如故。羨之起自布衣，又無學術，直以志力局度，一旦居廊廟，朝野推服，咸謂有宰臣之望。沈密寡言，不以憂喜見色。傅亮、蔡廓常言徐公曉萬事，安異同。高祖晏駕，與中書令傅亮、領軍將軍謝晦、鎮北將軍檀道濟同被顧命。

少帝失德，羨之廢之而立文帝，爲文帝所誅。

劉敬宣

敬宣字萬壽，彭城人，鎮北將軍劉牢之之子也，與武帝同宗。晉末孫恩之亂，敬宣爲會稽世子司馬元顯諮議參軍，助武帝破賊於句章。武帝功名日盛，敬宣深相憑結，情好甚隆。武帝西平譙蜀，北定南燕，南克盧循，敬宣並從征，累功爲使持節、督北青州諸軍事、征虜將軍、北青州刺史，進號右將軍。宋書劉敬宣傳：

隆安三年，王恭起兵於京口，以討司馬尚之兄弟爲名，牢之爲恭前軍司馬，而恭以豪戚自居，甚相陵忽。

又曰：

敬宣寬厚，善待士，多伎藝，弓馬音律，無事不善。尚書僕射謝混自負才地，少所交納，與敬宣相遇，便盡禮著歡。或問混曰：「卿未嘗輕交於人，而傾蓋於萬壽，傾蓋謂駐車交蓋而語，喻情好甚密。後漢書朱穆傳：「紵衣傾蓋，遂隆其好。」何也？」混曰：「人之相知，豈可以一塗限。孔文舉禮太史子義孔融字文舉，太史慈字子義。慈避難遼東，融奇其行誼，數遣人訊問其母，並致餽遺，夫豈有非之者也。」

是敬宣蓋以佐命有才藝爲謝混所善，時人則以寒門視之也。

荀伯玉

伯玉字弄璋，廣陵人，事齊高帝於潛邸。南齊書荀伯玉傳：

太祖鎮淮陰，伯玉歸身結事，爲太祖冠軍刑事參軍，宋泰始元年，以齊高帝假冠軍將軍，持節，都督北討諸軍事，鎮淮陰由是親待。從太祖還都，除奉朝請，轉太祖平南府參軍。宋元徽二年，以齊高帝爲平南將軍太祖爲南兗州，伯玉轉鎮軍中兵參軍，帶廣陵令。齊高帝自平南將軍遷中領軍、鎮軍將軍，領南兗州刺史元徽五年，帶濟陽太守，中兵如故。元徽五年，齊高帝進位侍中、司空、錄尚書事、驃騎大將軍，領南兗州刺史，

進領南徐州。濟陽郡屬南徐州霸業既建謂廢蒼梧，立順帝，擅朝政，伯玉忠勤盡心，常衛左右。加前將軍，隨太祖太尉府轉中兵將軍。宋昇明二年，齊高帝進位太尉，太守如故。建元元年，封南豐縣子，愈見親信，軍國密事，多委使之。時人爲之語曰：「十敕五令，不如荀伯玉命。」世祖深怨伯玉齊武帝廟號世祖。武帝在東宮，專斷僭擬，伯玉密啓於高帝，故武帝怨之，上臨崩，指伯玉謂世祖曰：「此人事我忠，我身後人必爲其作口過，汝勿信也。」

伯玉與垣崇祖善，永明元年，武帝誅垣崇祖崇祖以戰功爲武帝所忌，並誅伯玉。

江謐

謐字令和，濟陽考城人，早事高帝。南齊書江謐傳：

太祖領南兗州，謐爲鎮軍長史、廣陵太守，入爲游擊將軍。性流俗，善趨勢利。蒼梧王廢後，物情尚懷疑惑，謐獨竭誠歸事太祖，以本官領尚書左丞。昇明元年，遷黃門侍郎，左丞如故。沈攸之事起攸之自荊州舉兵討齊高帝，謐加太祖黃鉞，謐所建也。事平，遷吏部郎，稍被親待，遷太尉諮議，領錄事參軍。齊臺建昇明三年，齊高帝進位相國，總百揆，封齊公，備九錫之禮，爲右衛將軍。建元三年，爲左民尚書。諸皇子出閣出閣謂出任方面，用文武主帥行事、典籤，皆以委謐。尋敕曰：「江謐寒士，誠當不得競等華儕。然甚有才幹，堪可委遇，可遷掌吏部。」謐才長刀筆，所在事辦。

武帝立，以怨望爲武帝所誅。

王敬則

敬則，晉陵南沙人，母爲女巫。敬則初以勇力事宋明帝爲龍驤將軍，後廢帝立，轉越騎校尉。後廢帝狂暴，齊高帝時爲中領軍，有威名，敬則乃歸誠於高帝。南齊書王敬則傳：

蒼梧王狂虐，左右不自保，敬則以太祖有威名，歸誠奉事。每下直，輒往領軍府。夜著青衣，扶匍道路，爲太祖聽察蒼梧去來。太祖命敬則於殿內伺機，未有定日，既而楊玉夫等危急殞帝。敬則時在家，玉夫將首投敬則，敬則馳詣太祖，太祖慮蒼梧所誑，不開門，敬則乃於牆上投進其首。太祖索水洗視，視竟，乃戎服出，敬則從入宮。昇明元年，遷員外散騎常侍、輔國將軍、驍騎將軍，知殿內宿衛兵事。沈攸之事起，進敬則號冠軍將軍，太祖入守朝堂。袁粲起兵夕，領軍劉韞、直閣將軍卜伯興等於宮內相應，戒嚴將發，敬則開關掩襲，皆殺之，殿內竊發盡平，敬則之力也。遷右衛將軍，常侍如故。齊臺建，爲中領軍。建元元年，出爲使持節、散騎常侍、都督南兗兗徐青冀五州軍事、平北將軍、南兗州刺史。二年，進號安北將軍，尋遷使持節

、散騎常侍、安東將軍、吳興太守。三年，改授侍中、撫軍將軍。太祖遺詔敬則以本官領丹陽尹，尋遷爲使持節、散騎常侍、都督會稽東陽新安臨海永嘉五郡軍事、鎮東將軍、會稽太守。

武帝卽位，累遷司空，常侍如故，武帝崩，遺詔改加侍中。鬱林王立，出爲使持節、都督會稽東陽臨海永嘉新安五郡軍事、會稽太守，本官如故。海陵王立，進位太尉。明帝卽位，進位大司馬。明帝既多殺害，敬則自以高、武舊臣，心懷憂恐，明帝外厚其禮而內相疑忌。永泰元年，明帝疾屢經危殆，以張瓌爲平東將軍、吳郡太守，密防敬則，敬則乃起兵反，爲臺軍所平。

陳顯達

顯達，南彭城人，宋孝武世爲張永前軍幢主，明帝泰始初以軍主隸徐州刺史劉懷珍。宋末，累遷冠軍將軍、廣州刺史。沈攸之事起，輸誠於齊高帝。南齊書陳顯達傳：

沈攸之事起，顯達遣軍援臺晉宋以來稱禁省曰臺，遣表疏歸心太祖，進使持節、左將軍。沈攸之平，除散騎常侍、左衛將軍，轉前將軍、太祖太尉左司馬。齊臺建，爲散騎常侍、左衛將軍，領衛尉。太祖卽位，遷中護軍，轉護軍將軍。建元二年，虜寇壽陽，淮南江北百姓騷動，上以顯達爲使持節、散騎常侍、都督南充兗徐青冀五州諸軍事、平北將軍、南充州刺史。虜退，遷都督寧益二州軍事、安西將軍、益州刺史，領宋寧太守，持節、常侍如故。世祖卽位，進號鎮西。永明二年，徵爲侍中、護軍將軍。五年，以顯達爲使持節、散騎常侍、都督雍梁南北秦郢州之竟陵司州之隨郡諸軍事、鎮北將軍、領寧蠻校尉、雍州刺史。八年，進號征北將軍。其年，仍遷侍中、鎮軍將軍。尋加中領軍，出爲使持節、散騎常侍、都督江州諸軍事、征南大將軍、江州刺史。顯達謙厚有智計，自以人微位重，常有愧懼之色，謂其子曰：「麈尾、扇是王、謝家物，汝不須捉此自隨。」十一年秋，虜動，詔屯樊城，世祖遺詔卽本號征南大將軍開府儀同三司。征鎮加大開府爲從公隆昌鬱林年號元年，遷侍中、車騎將軍，開府如故。豫廢鬱林之勳，延興海陵年號元年，爲司空。高宗明帝廟號卽位，進太尉，侍中如故。

明帝性猜忌，亟行誅戮，顯達心懷不安，深自貶匿。明帝末年，北虜頻寇雍州，失沔北五郡，詔顯達北討，軍未發而明帝崩。東昏卽位，永元元年，顯達督平北將軍崔慧景衆軍四萬擊魏，敗於馬圈城，死者三萬餘人。顯達自表辭職，不許，更以顯達爲都督江州軍事、江州刺史，持節、本官如故，尋加領征南大將軍。時東昏數誅大臣，傳聞將遣兵襲江州，顯達乃自尋陽舉兵襲建康，至新林，爲臺軍所平。

呂僧珍

僧珍字元瑜，東平范人也。世居廣陵，起自寒賤。僧珍初事梁武帝父順之爲書佐，梁武帝爲豫州刺史，以僧珍爲典籤。齊建武二年，補羽林監。東昏卽位，梁武帝爲雍州刺史，僧珍固求西歸，梁武帝命爲中兵參軍，委以心膂，出入臥內，宣通意旨。梁書呂僧珍傳：

高祖武帝廟號受禪，以爲冠軍將軍、前軍司馬。尋遷給事中、右衛將軍。頃之，轉左衛將軍，加散騎常侍，入直秘書省，總知宿衛。天監四年冬，大舉北伐，自是軍機多事，僧珍晝直中書省，夜還秘書省。僧珍去家久，表求拜墓，高祖欲榮之，使爲本州，乃授使持節、平北將軍、南充州刺史。在州百日，徵爲領軍將軍，尋加散騎常侍，直秘書省如先。僧珍有大勳，任總心膂，恩遇隆密，莫與爲比。

徐勉

勉字脩仁，東海郟人也。幼孤貧，早勵清節。及長，篤志好學，起家國子生，射策舉高第，初與梁武帝兄蕭懿遊，爲武帝所器賞。梁書徐勉傳：

高祖踐阼，拜中書侍郎，遷建威將軍。天監二年，除給事黃門侍郎、尚書吏部郎，參掌大選，遷侍中。時王師北伐，候驛填委，勉參掌軍書，劬勞夙夜，動經數旬，乃一還宅。六年，除給事中、五兵尚書，遷吏部尚書。勉居選官，彛倫有序，旣閑尺牘，兼善詞令，雖文案填積，坐客充滿，應對如流，手不停筆。遷左衛將軍，領太子中庶子，尋加散騎常侍，遷尚書左僕射，又除尚書僕射、中衛將軍。勉以舊恩，越升重位，盡心奉上，知無不爲，爰自小選，迄於此職，常參掌衡石，甚得士心。禁省中事，未嘗漏洩，每有表奏，輒焚稿草。博通經史，多識前載，朝儀國典，婚冠吉凶，勉皆預圖議。

僧珍終於領軍將軍，勉卒於特進、右光祿大夫。

以上皆寒門由佐命勳臣秉權之例。

寒門由軍功顯者以沈慶之、沈攸之叔侄爲尤著。慶之字弘先，吳興武康人，少有志力。晉末孫恩之亂，遣人寇武康，慶之未冠，隨鄉族擊之，由是以勇聞。宋武帝永初二年，隸到彥之北伐，轉隸檀道濟，道濟稱慶之忠謹曉兵於文帝，稍得引接，出入禁省，累遷太子步兵校尉。元嘉末，副寧朔將軍王玄謨北伐。孝武帝卽位，以慶之爲領軍將軍，出爲使持節、督南充豫徐兗四州諸軍事、鎮軍將軍、南充州刺史，鎮廣陵。孝建元年，平魯爽之亂，進號鎮北大將軍，進督青冀幽三州，尋加開府儀同三司，固辭，以郡公罷就第。大明三年，司空竟陵王誕據廣陵反，復以慶之爲使持節、都督南充徐兗三州諸軍事、車騎大將軍、開府儀同三司、南充州刺史，

率軍討平之。孝武帝崩，前廢帝立，以慶之爲侍中、太尉。廢帝與其姑新蔡長公主爲淫亂，殺公主夫寧朔將軍何邁，慮慶之入諫，遣慶之從子攸之齎藥賜慶之死，時年八十。

沈攸之字仲達，慶之之從父兄子也。元嘉末，魏軍南寇，發三吳吳、吳興、會稽爲三吳民丁禦之，攸之亦被發，隨慶之北征。明帝卽位，累功寧朔將軍。晉安王子勛舉兵於尋陽，明帝以司徒建安王休仁都督征討諸軍事，兗州刺史殷孝祖爲前鋒都督，將兵西討。臺軍戰不利，孝祖敗歿，明帝以攸之爲輔國將軍、假節，代孝祖都督前鋒諸軍事。攸之破西軍於楮圻，進破之於濃湖，遂平其亂，遷中領軍。徐州刺史薛安都初據彭城以應子勛，子勛敗，請降於明帝，明帝命攸之與鎮軍將軍張永將兵五萬迎之，安都懼而降魏。魏軍救彭城，破宋軍於呂梁，永、攸之僅以身免。明帝以攸之假冠軍將軍、持節、行南兗州刺史，將兵爭彭城，宋軍復潰，攸之還屯淮陰，徵爲左衛將軍。出爲持節、監郢州諸軍事、郢州刺史，進監豫州之西陽司州之義陽二郡軍事，進號鎮軍將軍。明帝崩，後廢帝立，以攸之爲都督荆湘等八州諸軍事、荊州刺史。元徽二年，江州刺史桂陽王休範自尋陽舉兵，攸之遣兵馳下應朝廷，休範平，攸之進號征西大將軍。攸之既擅閭外，朝廷疑憚之，累欲徵入，慮不受命，乃止。順帝卽位，進攸之號車騎大將軍、開府儀同三司。攸之以齊高帝名位素出己下，一旦專制朝權，心不能平。昇明元年十二月，攸之舉兵於荊州，以討齊高帝爲名，至郢城，攻之不克。昇明二年正月，攸之軍自潰，攸之引餘兵還向江陵，江陵已先爲雍州刺史張敬兒所襲據。攸之進退無據，與其子文和走至華容界，衆散略盡，自縊於櫟林。

按宋書沈慶之傳，慶之手不知書，眼不識字；沈攸之傳，攸之初被發爲兵，以形陋不得補隊主，是二沈並出身寒賤也。餘如孫處事宋武帝爲振武將軍宋書孫處傳，酈恩至輔國將軍宋書酈恩傳，劉鍾至龍驤將軍宋書劉鍾傳，虞丘進至太子右衛率宋書虞丘進傳。周山圖仕宋爲寧朔將軍，入齊爲輔國將軍，兗州刺史南齊書周山圖傳。周盤龍仕宋至假節，征虜將軍，司州刺史南齊書周盤龍傳。王廣之仕宋爲寧朔將軍，入齊爲侍中，鎮軍將軍南齊書王廣之傳。戴僧靜仕宋爲積射將軍，羽林監，入齊爲征虜將軍，南中郎司馬，淮南太守南齊書戴僧靜傳。桓康事齊高帝至冠軍將軍，持節，督青、冀二州、東徐之東莞、琅邪二郡、朐山戍、北徐之東海、澠口戍諸軍事，青、冀二州刺史南齊書桓康傳。皆以寒賤自軍功起。陳朝寒素由軍功顯者尤衆。杜僧明隨陳武帝平侯景之亂，累功至使持節，通直散騎常侍，平北將軍，南兗州刺史陳書杜僧明傳。周文育從陳武帝討侯景，誅王僧辯，累功至使持節，散騎常侍，鎮南將軍，開府儀同三司陳書周文育傳。侯瑒梁末累軍功至車騎將軍，侍中，使持節，都督江、晉、吳

、齊四州諸軍事，江州刺史，陳武帝即位，授侍中，車騎將軍，進位司空，文帝即位，進位太尉陳書侯瑱傳。吳明徹從陳武帝討侯景之亂，累功至司空陳書侯明徹傳。周鐵虎初從王僧辯討侯景，後轉從陳武帝，仕至散騎常侍，嚴威將軍，太子左衛率陳書周鐵虎傳。程靈洗初從王僧辯討侯景，後歸陳武帝，累功授安西將軍；子文季，仕陳至持節，都督北徐、仁州諸軍事，安遠將軍，北徐州刺史陳書程靈洗傳。黃法甍從陳武帝討侯景，累功授平南將軍，開府儀同三司，宣帝時，累遷侍中，使持節，散騎常侍，都督豫、建、光、朔、合、北徐六州諸軍事，征南大將軍，豫州刺史陳書黃法甍傳。淳于量初從王僧辯討侯景，後歸陳武帝，仕至散騎常侍，都督，鎮西大將軍，開府儀同三司，文帝即位，進號征南大將軍陳書淳于量傳。章昭達初率募鄉人討侯景，復從文帝討杜龕、陳寶應，累功授鎮前將軍，出為使持節，都督江、郢、吳三州諸軍事，鎮南將軍，江州刺史，宣帝即位，進號車騎大將軍，遷司空陳書章昭達傳。胡穎從陳武帝討侯景，累功至持節，散騎常侍，仁威將軍，兼丹陽尹，左衛將軍陳書胡穎傳。徐度從陳武帝討侯景，累功為鎮右將軍，督徐州緣江諸軍事，鎮北將軍，南徐州刺史，文帝嗣位，遷侍中，都督湘、沅、武、巴、郢、桂六州諸軍事，鎮南將軍，湘州刺史，入為侍中，中軍大將軍，廢帝即位，進位司空陳書徐度傳。杜陵從陳武帝討侯景，累官侍中，忠武將軍，中領軍，廢帝即位，遷鎮右將軍，特進，護軍將軍陳書杜陵傳。沈恪從陳武帝討侯景，累功除散騎常侍，忠武將軍，會稽太守，武帝即位，遷護軍將軍，宣帝即位，加散騎常侍，出為都督廣、衡等十八州諸軍事，鎮南將軍，平越中郎將，廣州刺史，徵入為領軍將軍，加侍中，遷護軍將軍，後主即位，改授散騎常侍，特進，金紫光祿大夫陳書沈恪傳。蓋梁末侯景創亂，故寒素從陳武帝平亂由軍功而顯者甚衆。

寒素以才力幹捷見信於君主者是為恩倖。宋書恩倖傳序：

夫小人君子，類物之稱。蹈道則為君子，違之則為小人。落鈞，卑事也；版築，賤役也。太公起為周師太公謂姜尚，起於落鈞，為周太師，傳說去為殷相傳說與於版築，為商湯相。明揚幽仄，唯才是與，逮於二漢，茲道未革，非若晚代分為二塗者也。古者君子小人以道德分，非以門第別，未若晚代以世族為君子，寒素為小人也。晚代，謂魏晉以還漢末喪亂，魏武始基軍中始基猶曰蠶基，倉卒權立九品魏文即位，用尚書陳羣議，立九品官人之法。此云魏武肇基軍中，臨事倉卒，未克沿用漢代察舉之制，至魏文始權立九品之法以代漢之鄉評里選也，蓋以論人才優劣，非為世族高卑。因此相沿，莫之能改。而舉世人才升降蓋寡九品本以升降人才，賢者升進，不肖者降下，徒以憑藉世資，用相陵駕，劉毅所云下品無高門，上品無賤族者也。晉書劉毅傳毅疏云：「今之中正，不精才實，務依黨利，不均稱尺，務隨愛憎。隨世興衰，衰則削下，興則扶上。無報於身必見

割奪，有私於己必得所欲，是以上品無寒門，下品無勢族。」歲月遷謫，斯風漸篤，凡厥衣冠，莫非二品。二品謂高門與寒素，自此以還，遂成卑庶。夫人君南面，九重奧絕，楚辭九辯：「君之門以九重。」，陪奉朝夕，義隔卿士，階闥之任供呼喚驅使，宜有司存。既而恩以倖生，信由恩固，無可憚之姿，有易親之色。孝建宋孝武帝年號泰始宋明帝年號，主威獨運，官置百司，權不外假，而刑政糾雜，理難徧通，耳目所寄，事歸近習。賞罰之要，是謂國權，出內王命，由其掌握。於是方塗結軌，輻湊同奔，人主謂其身卑位薄，以為權不得重，曾不知鼠憑社貴，狐藉虎威，外無逼主之嫌，內有專用之功，勢傾天下，未之或悟。

南齊書倖臣傳序：

中書之職，舊掌機務。漢元以令、僕用事，尚書置令、僕射，漢用中官領尚書之職，曰中尚書，亦曰中書。魏明以監、令專權，魏文帝改秘書為中書，置監、令，專掌詔誥，異於漢之中書也。魏明帝時，其權尤重。及在中朝，猶為重寄。中朝謂西晉，西晉都洛，故自江左至南朝稱之為中朝。中書專典詔命，其任甚重。晉書荀勗傳，勗為中書監，遵守尚書令，或有賀之者，勗曰：「奪我鳳凰池，諸君賀我邪！」晉令舍人位居九品，舍人，宮舍近職也。江左置通事郎，通事郎屬中書，專管詔誥。其後郎還為侍郎，郎謂通事郎，侍郎謂中書侍郎，而舍人亦稱通事，是為通事舍人。舍人本近習之職，冠以通事之稱，則侵及中書之職矣。宋文帝用狄當、周糾，並出寒門，孝武以來，士庶雜選，士謂鮑照，以才學知名，庶謂巢尚之，以辯捷見知。及明帝世，胡母顗、阮佃夫之徒，專為倖倖矣。齊初亦用久勞及親信，關讞表啓，發署詔敕，頗涉辭翰者，亦為詔文，侍郎之局，復見侵矣。侵中書之權。建武齊明帝年號之世，詔命殆不關中書，專出舍人省。內舍人四人，所置四省，其下有主書令史，人數無員，莫非左右要密。天下文簿版籍，入副其省，入副本於舍人省，萬機嚴密，有如尚書。有制局監，領器械兵仗，亦用寒人被恩幸者。

梁書武帝紀論：

及乎老年，委事羣倖。朱异之徒，作威作福，挾朋樹黨，政以賄成，服冕乘軒，由其掌握，是以朝經混亂，賞罰無章，小人道長，抑此之由。

陳書虞荔傳亦曰：

時梁武帝時左右之任，多參權軸，內外機務，互有帶掌。

又陳書後主紀論：

自魏正始魏齊王年號、晉中朝以來，貴臣雖有識治者，皆以文學相處，罕關庶務，朝章大典，方參議焉。文案簿領，咸委小吏，浸以成俗。迄至於陳，後主因循，未遑改革。故施文慶、沈客卿之徒，專掌軍國要務，茲黠左道，以

哀刻爲功，自取身榮，不存國計。

又曰：

後主賓禮諸公，唯寄情於文酒，昵近羣小，皆委之以衡軸。謀謨所及，遂無骨鯁之臣，權要所在，莫匪侵漁之吏。政刑日紊，尸素盈朝。

陳書傅縡傳亦云：

施文慶、沈客卿以便佞親幸，專制衡軸。

蓋自宋至陳，世族大抵人貴而任疏，恩倖則以寒素握權柄。恩倖權勢尤重者，宋有顏師伯、徐爰、巢尚之、戴法興、戴明寶、阮佃夫、王道隆、楊運長，齊有紀僧真、劉係宗、茹法亮、呂文顯、呂文度，梁有朱异，陳有施文慶、沈客卿。

宋書王景文傳，明帝詔景文曰：

大明宋孝武帝年號之世，巢、徐、二戴，位不過執戟執戟，喻宿衛近臣。史記淮陰侯傳：「官不過郎中，位不過執戟。」秦漢有執戟郎，主更直宿衛殿門，權亢人主。顏師伯白衣僕射，橫行尚書中。

白衣，謂其出身寒素也。師伯，琅邪臨沂人，少孤貧，涉獵書傳，頗解聲樂，事孝武帝於潛邸。孝武帝卽位，累遷吏部尚書，領右軍將軍，親幸隆密，羣臣莫二。宋書顏師伯傳：

上不欲威柄在人，親覽庶務，前後領選者，唯奉行文書。師伯專情獨斷，奏無不可。遷侍中，領右衛將軍。七年大明七年，補尚書右僕射。世祖臨崩，師伯受遺詔輔幼主，尚書中事，專以委之。師伯居權日久，天下輻輳，游其門者爵位莫不逾分，多納貨賂，家產豐積，伎妾聲樂，盡天下之選，園池第宅，冠絕當時，驕奢淫恣，爲衣冠所嫉。

徐爰，南琅邪開陽人，本名瑗，後以與傅亮父同名，改爲爰。爰爲人微密有理，初爲宋武帝所知。少帝在東宮，入侍左右，文帝卽位，又見任，累官員外散騎侍郎。孝武帝將卽位，不曉朝章，爰素諳其事，爲撰立儀注，累遷尚書左丞。先是元嘉中，使著作郎何承天草創國史，孝武帝初，又使奉朝請山謙之、南臺御史蘇寶生踵成之。孝建六年，以爰領著作郎，使終其業。爰雖因前作，而專爲一家之書。宋書徐爰傳：

爰便僻善事人，能得人主微旨。頗涉書傳，尤悉朝儀。元嘉初，便入侍左右，預參顧問，既長於附會，又飾以典文，故爲太祖所任遇。大明世委寄尤重，朝廷大禮儀注，非爰議不行，雖復當時碩學，所解過人者，既不敢立異議，所言亦不見從。前廢帝凶暴無道，殿省舊人多見罪黜，唯爰巧於將迎，始終無忤。誅羣公後，以爰爲黃門侍郎，領射聲校尉，著作如故。寵待隆密，

羣臣莫二。

巢尚之，魯郡人；戴法興，會稽山陰人；戴明寶，南東海丹徒人。宋書五行志一：

孝武世幸臣戴法興權亞人主。

宋書顧覲之傳：

幸臣戴法興權傾人主。

宋書蔡興宗傳：

前廢帝即位，政歸近習。越騎校尉戴法興、中書舍人通事舍人巢尚之專制朝權，威行遠近。

宋書戴法興傳：

法興家貧，少賣葛於山陰市，後爲大將軍彭城王義康記室令史，轉爲世祖征虜、撫軍記室掾。上世祖孝武帝爲江州南中郎將領江州刺史，補南中郎典籤。上於巴口建義，法興與戴明寶俱轉參軍督護。上即位，並爲南臺御史兼中書通事舍人。法興等專管內務，權重當時。孝建元年，加建武將軍、南魯郡太守，解舍人，侍太子於東宮。大明二年，轉員外散騎侍郎、給事中、太子旅賁中郎將，太守如故。世祖親覽朝政，不任大臣，而腹心耳目，不得無所委寄。法興頗知古今，素見親待，雖出侍東宮，而意任隆密。魯郡巢尚之，人士之末。元嘉中，侍始興王濬讀書，亦涉獵文史，爲上所知。孝建初，補中書通事舍人。凡選授遷轉，誅賞大處分，上皆與法興、尚之參懷，內外諸雜事，多委明寶。上性嚴暴，睚眦之間，動至罪戮，尚之每臨事解釋，多得全免，而法興、明寶大通人事，多納貨賄，凡所薦達，言無不行，天下輻湊，門外成市，家產並累千金。明寶驕縱尤甚，長子敬爲揚州從事，與上爭買御物，六宮嘗出行，敬盛服騎馬，於車左右馳驟去來。上大怒，賜敬死，繫明寶尚方，尋被原釋，委任如初。世祖崩，前廢帝即位，法興遷越騎校尉。法興、尚之執權日久，威行內外，廢帝未親萬機，凡詔敕施爲，悉決法興之手，尚書中事，無大小專斷之。

又宋書戴明寶傳：

前廢帝卽阼，權任悉歸法興。太宗初，天下反叛，軍務煩擾，以明寶舊人，屢經戎事，復委任之。

阮佃夫，會稽諸暨人；王道隆，吳興烏程人；楊運長，宣城懷安人。佃夫、道隆初以小吏事宋明帝於藩邸，與主衣壽寂之等弑前廢帝，運長則以善射事明帝。明帝立，佃夫、道隆、運長俱爲明帝所親任，並執權要，而佃夫、道隆奢僭，運長廉

靖。宋書阮佃夫傳：

時佃夫、王道隆、楊運長並執權柄，亞於人主，巢、戴大明之世，方之蔑如也。佃夫大通貨賄，凡事非重賂不行。宅舍園池，諸王邸第莫及。妓女數十，藝貌冠絕當時，金玉錦繡之飾，宮掖不逮也。每製一衣，造一物，京邑莫不法效焉。於宅內開瀆，東出十許里，塘岸整潔，汎輕舟，奏女樂。中書舍人劉休嘗詣之，值佃夫出行，中路相逢，要休同反就席，便命施設，一時珍羞，莫不畢備，凡諸火劑，並皆始熟，如此者數十種。佃夫嘗作數十人饌以待賓客，故造次便辦，類皆如此，雖晉世王石王愷、石崇，不能過也。泰始初，軍功既多，爵秩無序，佃夫僕從附隸，皆受不次之位，捉軍人虎賁中郎，傍馬者員外郎。朝士貴賤，莫不自結。泰豫元年，除寧朔將軍、淮南太守，遷驍騎將軍，尋加淮陵太守。太宗晏駕，後廢帝即位，佃夫權任轉重，兼中書通事舍人，加給事中、輔國將軍，餘如故。元徽三年，遷黃門侍郎，領右軍將軍，太守如故。明年，改領驍騎將軍，其年，遷使持節、都督南豫州諸軍事、冠軍將軍、南豫州刺史、歷陽太守，猶管內任。

宋書王道隆傳：

道隆爲太宗所委，過於佃夫。和謹自保，不妄毀傷人。執權既久，家產豐積，豪麗雖不及佃夫而精整過之。

宋書楊運長傳：

運長性謹慤，爲太宗所委信。及即位，親遇甚厚，與佃夫、道隆等並執權要。後廢帝即位，與佃夫俱兼通事舍人，加龍驤將軍，轉給事中。元徽三年，遷後軍將軍，兼舍人如故。運長質木廉正，治身甚清，不事園宅，不受餉遺，而凡鄙無識知，唯與寒人潘智、徐文盛厚善，動止施爲，必與二人量議。

紀僧眞，丹陽建康人，初從宋征西將軍蕭思話及子惠開，皆被賞遇。惠開卒，轉從齊高帝，高帝爲冠軍將軍，以僧眞爲冠軍府參軍主簿，遂見親待。南齊書紀僧眞傳：

建元初，轉羽林監，加建威將軍，遷尚書主客郎，復以本官兼中書舍人。太祖疾甚，令僧眞典遺詔。僧眞容貌言吐，雅有士風。世祖嘗目送之，笑曰：「人何必計門戶，紀僧眞常貴，言僧眞雖門寒而爲君主所眷遇人所不及。」諸權要中最被盼遇。

劉係宗，丹陽人，宋元徽初爲奉朝請兼中書通事舍人非正直者曰員外。齊高帝廢宋蒼梧王後廢帝，呼正直舍人虞整，寫諸處分敕令及四方書疏，整醉不能起，使係宗代之，事皆稱旨，遂見親任。南齊書劉係宗傳：

太祖卽位，除龍驤將軍、建康令。永明元年，除寧朔將軍，令如故。尋轉右軍將軍、淮陵太守，兼中書通事舍人。永明中，虜使書常令係宗題答，秘書書局皆隸之。係宗久在朝省，閑於職事。明帝曰：「學士不堪治國，學士謂文學之士唯大讀書耳，一劉係宗足持如此輩五百人。」

茹法亮，吳興武康人。宋大明中，出身小史，累遷齊高帝冠軍府行參軍。齊武帝爲江州刺史，以法亮爲典籤。南齊書茹法亮傳：

世祖鎮益城，法亮求留爲上江州典籤，除南臺御史，帶松滋令。法亮便辟解事，善於承奉，稍見委信。建元初，除奉朝請，補東宮通事舍人。世祖卽位，仍爲中書通事舍人，除員外郎。

呂文顯，臨海人，初事宋孝武帝爲小吏，後事齊高帝，累遷殿中侍御史、羽林監。永明元年，除寧朔將軍、中書通事舍人。南齊書呂文顯傳：

文顯治事，以刻覈被知，與茹法亮等迭出入爲舍人，並見親倖。四方餉遺，歲各數百萬，並造大宅，聚山開池。

呂文度，會稽人。宋末，沈攸之事起，齊武帝出鎮益城，以文度知軍隊雜役，由是見親。南齊書呂文度傳：

世祖卽位，爲制局監，帶南濮陽太守，殿內軍隊及發遣外鎮人悉關之，甚有要勢。

朱异，吳郡錢唐人。出身寒微，長而折節從師，遍治五經，尤明禮、易，涉獵文史，兼通雜藝。五經博士明山賓薦之於梁武帝，說孝經、周易義，武帝甚悅之，召直西省西省卽宮省，對東府而言。梁書朱异傳：

俄兼太學博士，遷尚書儀曹郎，入兼中書通事舍人，累遷鴻臚卿、太子右衛率，尋加員外常侍。中大通元年，遷散騎常侍。自周捨卒後，异代掌機謀，方鎮改換，朝儀國典，詔誥敕書，並兼掌之。每四方表疏，當局簿領，諮詢詳斷，填委於前。异屬辭落紙，覽事下議，從橫敏瞻，不暫停筆，頃刻之間，諸事便了。大同四年，遷右衛將軍。八年，改加侍中。太清元年，遷左衛將軍，領步兵步兵校尉。二年，遷中領軍，舍人如故雖居官屢遷而兼中書通事舍人如故。异居權要三十餘年，善窺人主意，曲能阿諛以承上旨，故特被寵任。

施文慶，不知何許人，家本吏門，至文慶而好學，頗涉書史，事陳後主於東宮，及後主卽位，擢爲中書舍人。南史施文慶傳：

文慶聰敏強記，明閑吏職。屬隋師臨境，軍國事務，多起倉卒，文慶心算口占，應時條理，由是大被親幸。又自太建以來，吏道疏簡，百司弛縱，文慶盡其力用，無所縱捨，分官聯事，莫不振懼。又引沈客卿、陽惠朗、徐哲、

暨惠景等，云有吏能，後主信之，然並不達大體，督責苛碎，聚斂無厭，後主益以文慶爲能，尤更親重，內外衆事，無不任委。累遷太子左衛率，舍人如故。禎明三年，進其黨沈客卿，共掌機密。

沈客卿，吳興武康人，美風采，善談論，博涉羣書，與施文慶少相親昵，仕陳累遷至尚書儀曹郎。南史沈客卿傳：

客卿聰明有口辯，頗知故事。每朝廷體式，吉凶儀注，凡所疑議，客卿斟酌裁斷，理雖不經，而衆莫能屈，事多施行。至德初，以爲中書舍人，兼步兵校尉，掌金帛局。後主盛修宮室，窮極耳目，府庫空虛，有所興造，恆苦不給。客卿每立異端，唯以刻削爲事。於是以陽惠朗爲太市令，暨惠景爲尚書金倉都令史。二人家本小吏，考校簿領，毫釐不差，糾謫嚴急，百姓嗟怨，而客卿居舍人，總以督之，每歲所入，過於常格數十倍，後主大悅。尋加客卿散騎常侍、左衛將軍，舍人如故。禎明三年，與文慶俱掌機密。

按梁書武帝紀，云武帝晚年，「委事羣倖」「小人道長」，則梁武晚年所任寒素，固不止朱异一人也。陳起自寒門，故多用寒素掌權要。如武帝用趙知禮爲散騎常侍，謝岐、劉師知、蔡景歷爲中書舍人。文帝用華皎爲平南將軍，都督湘巴等四州，韓子高爲右衛將軍。宣帝用宗元饒爲通直散騎常侍，毛喜爲中書舍人。後主亦用蔡徵爲吏部尚書。知禮沈靜有謀謨陳書趙知禮傳，岐調度軍糧，所在幹理陳書謝岐傳，師知有當世才陳書劉師知傳，景歷俊爽有孝行陳書蔡景歷傳，皎御下分明，善於撫養陳書華皎傳，子高有膽決，勤於侍奉陳書韓子高傳，元饒性公平，善持法陳書宗元饒傳，徵於憲章儀軌，多所詳究陳書蔡徵傳，蓋並以才用爲君主所親任。

然寒門雖握重權，其地位仍不得與世族爲比。宋路太后侄瓊之詣王僧達，僧達不以禮見。宋書路淑媛傳：

文帝路淑媛諱惠男，丹陽建康人也，以色貌選入後宮，生孝武帝，拜爲淑媛，孝建二年，追贈太后。太后頗豫政事，弟子瓊之及弟休之、茂之並起居顯職，居處服器與帝子相伴。瓊之宅與太常王僧達並門，嘗盛車服衛從造僧達，僧達不爲之禮。瓊之以訴太后，太后大怒，告上曰：「我尚在，而人皆陵我家，死後乞食矣。」欲罪僧達。上曰：「瓊之年少，自不宜輕造詣。王僧達貴公子，豈可以此加罪。」

中書舍人狄當、王弘俱爲宋文帝所親任，而琅邪諸王不與同席。宋書蔡興宗傳：

元嘉初，中書舍人狄當詣太子詹事王曇首，不敢坐。其後中書舍人王弘爲太祖所愛遇，上謂曰：「卿欲作士人，得就王球坐，乃當判耳。若往詣球，可稱旨就席。」球舉扇曰：「若不得爾。」弘還，依事啓聞，帝曰：「我便無

如此何。」

當又嘗與中書舍人周糾同詣張敷，敷呼左右移床遠客。宋書張敷傳：

元嘉初，中書舍人狄當、周糾並管要務，以敷同省名家，往詣之。敷先設二牀，去壁三四尺，二客就席，酬接甚歡，既而呼左右曰：「移我遠客。」糾等失色而去。

右軍將軍王道隆爲宋明帝所親任，見蔡興宗，不敢就席。宋書蔡興宗傳：

遷鎮東將軍，會稽太守，都督會稽、東陽、新安、永嘉、臨海五郡諸軍事。太宗崩，與尚書令袁粲、右僕射褚淵、中領軍劉劭、鎮軍將軍沈攸之同被顧命，被徵還都。時右軍將軍王道隆任參內政，權重一時，躡履到前，不敢就席，良久方去，竟不呼坐。

齊中書舍人紀僧真詣江敷求作士大夫，敷命移牀讓客。南史江敷傳：

中書舍人紀僧真幸於齊武帝，稍歷軍校，容表有士風，謂帝曰：「臣小人，出自本縣武吏，適逢聖時，階榮至此，無復所須，唯就陛下乞作士大夫。」帝曰：「由江敷、謝朓，我不得措此意，可自詣之。」僧真承旨詣敷，登榻坐定，敷便命左右曰：「移吾牀讓客。」僧真喪氣而退，告武帝曰：「士大夫故非天子所命。」

路瓊之、狄當、王弘、周糾、王道隆、紀僧真等皆出身寒門，故位任雖重，仍不爲世族所齒。蓋世族、寒門判爲二塗，雖君主亦未能改變。